



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之二百六十六

咸豐八年戊午冬十月癸卯朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵○遣官祭

孝德皇后殯宮○遣官祭

端慧皇太子園寢○頒咸豐九年時憲書○諭內閣德興阿
 奏司道大員遷延搖惑請旨革職一摺據稱江甯藩司楊能
 格聞浦口師潰後即從揚州開船復由邵伯至裏下河屢次
 遷移以致居民搬徙紛紛失所又將軍火器械遺棄灣頭等
 處實屬遇事慌張心存畏蕙淮揚道郭沛霖逃避出城已有
 應得之咎又妄稟官軍潰退搖惑人心尤屬可惡楊能格著
 即革職暫行留任郭沛霖著先行革職均交邵燦庚長將德
 興阿所參各款確切查明據實參奏○又諭胡興仁奏甯海
 縣土匪戕官踞城旋經撲滅克復縣城一摺浙江甯海縣地
 方土匪聚眾滋事闖入縣城署知縣鄒全節抵禦被戕經署

提督阿麟保等。派撥兵勇。會同紳團。奮勇迎勦。槍礮齊施。殺斃匪黨多人。該匪潰圍逃遁。又經甯波府知府張玉藻。堵截殺斃七八十人。追殺被逐落水死者。不計其數。當將縣城克復。辦理尚為妥速。在事出力文武紳團。著胡興仁。擇尤保奏。候朕施恩。毋許冒濫。○予浙江甯海陣亡知縣鄒全節。祭葬世職。○甲辰。

上幸圓明園。○諭軍機大臣等。桂良等奏。滬陳夷情。並辦理棘手情形一摺。總以夷人不肯罷棄條約為言。在該夷自不肯輕罷前議。原欲桂良等。竭力設法。以圖補救。乃歷次奏報。於內定辦法。業已置之不論。而此次摺內。竟併駐京一節。亦有

不能挽回之勢。然則朕派桂良等前往上海。又命何桂清會同商辦。豈真專為稅則計耶。桂良等接奉疊次嚴諭。既知惶悚。尚非全無天良。不過希圖了事。不知目前兵端。固不可開。將來後患。豈可不慮。所謂以該夷之財。制該夷之命。不過徒託空談。豈能確有把握。總須將前諭四事。盡力挽回。即不能照內定辦法。亦可勉從所請。若徒事作難。必欲邀朕允許。然後將就了局。一奏塞責。試思桂良等。在津濫許該夷所求之事。據奏原思。日後挽回。若至今仍無補救。不獨無顏對朕。其何以對天下。何桂清身任封圻。特命會辦要事。而堅執己見。竟於國計無裨。桂良等隨同附和。牢不可破。清夜捫心。亦當

自愧前據奏稱該夷李泰國尚肯為我出力。何以此時並未見其相助說合。即前在天津所覓內綫黃姓諸人。桂良等所恃為轉圜者。何奏報中未見提及。如果似此情形。桂良等亦何所恃而輕許於前耶。至該夷欲赴漢口。尤須力為阻止。此時沿江賊船充斥。若夷船誤被損傷。中國豈能任咎。若因夷船經過。而我水師停兵相讓。設或賊船跟蹤直上。豈不攪我長江大局。該夷既真心和好。豈有不可理論。著桂良等剴切止之為要。疊次批示之後。本已無可再諭。朕不惜諄諄告戒。尚冀桂良等盡力圖維。以全大局。當此國家多難之時。盡一分心力。即為天下消一分禍害。桂良等受恩深重。身在局中。

責有攸歸。朕不能再為曲諒也。將此由六百里密諭桂良。花沙納。何桂清。並傳諭明善。段承實知之。○又諭。本日據勝保奏。懷遠逆匪。時圖出撲。請派大員赴潁。專司勦辦。或令楚軍赴正陽關。扼勦等語。懷遠捻匪。疊經官軍擊敗。仍思竄撲馬頭城。洛河街一帶。並圖竄撲壽州。勝保現須規復天長。以固東路大局。其勢自難兼顧。勦捻事宜。本係袁甲三督辦。俟唐訓方等所帶湖北兵勇四千名到徐宿一帶。即著與傅振邦會同辦理。徐宿勦匪事宜。袁甲三即行酌帶所部兵勇。折回潁州。正陽關一帶。妥籌防勦。以杜匪眾沿淮上竄。並可與翁同書聯絡聲勢。東西夾擊。本日據德安奏。業已行抵邵伯。惟

該處並無兵勇可歸統帶。久留無益。著勝保即將該提督調回。盱眙令其隨同該大臣進剿。勝保所請籌撥餉需已諭令何桂清。庚長於海關鹽課項下籌撥銀四五萬兩。並諭瑛榮將應解餉需改道由清江等處解往矣。將此由六百里諭知勝保。翁同書袁甲三並傳諭傅振邦知之。○又諭勝保奏餉需匱乏請飭迅速籌撥並改道運解各等語。勝保軍營餉需前因皖省經費支絀仍令由豫省派員辦理隨時接濟。自勝保督兵南下懷遠匪眾兩次撲擾馬頭城遂致西路餉道梗阻。現雖經翁同書通融接濟而杯水車薪無濟於事。當此勦辦正在得手之時豈容以餉需不繼貽誤大局。著何桂清庚

長即於海關鹽課項下籌撥銀四五萬兩。委員迅速解赴勝保軍營以濟急需。毋稍遲緩。現在勝保由盱眙進攻天長並著瑛榮嗣後籌解勝保軍餉改道由徐州清江盱眙一路前進。以免延誤。將此由五百里各諭令知之。○以楚軍克復安徽舒城縣城總兵官李續燾下部優敘。賞參將黃勝日謝永祜巴圖魯名號。均以副將用。餘升敘有差。予陣亡外委鄧益勝。楊熊。祭葬世職。文童蔣益深。祭葬世職。如從九品例。○乙巳諭內閣。前據勝保奏。擒首李兆受。請獻滁城。歸誠效順。當經准其免罪。並允所請。賞給三品頂帶花翎。俟立有戰功。再行保奏。茲據勝保奏稱。大兵進攻天長。李兆受分眾駐守來

安○甚為出力○旋復伏兵內應○克復天長○並赴滁州○率所部丁壯歸順○自願進襲全椒○以圖報效○實能輸誠歸正○奮勇立功○自應先給官階○以示嘉獎○李兆受者更名李世忠○以參將即行補用○如續有勞績○再由勝保奏請獎勵○其部下出力頭目○著該大臣查明覈實奏請恩施○此後各路軍營○遇有被陷賊中○棄邪歸正者○果能立功自贖○克復城池○亦當一體施恩○以昭激勸○諭軍機大臣等○勝保奏○官軍克復天長○並李世忠投誠出力各摺○均已明降諭旨○照所請獎勵矣○另片奏稱○懷遠擒匪○復撲馬頭城○徐廣縉等○兵勇失散○與翁同書奏報懷遠擒逆○於十八日攻撲壽州○焚掠數十里○情形相同○翁同書

因有賊匪竄撲定遠之信○已將派往廬州之兵○撤回定遠○並函致勝保○撥兵援應○是尚未知龍澤厚一軍○已有挫失○現在天長已復○勝保即日折回西路○定遠當可無虞○其攻撲壽州之匪○據翁同書又稱已向懷遠退去○其出沒靡常○尤應嚴加防範○著勝保於折回後○與翁同書妥籌堵剿○並查明徐廣縉龍澤厚所帶兵勇○退至何處○有無潰散情形○至楚軍已克舒城○進攻三河○相距廬州不遠○南北夾擊之機○亦不可失○李世忠既有攻襲全椒之舉○則由和州無為而下○皆可責令設法○攻拔○各該處城賊○與李世忠素相熟習者○自復不少○或設法內應○或以次進攻○但須官軍為之協助○亦未可任其獨往獨

來自成一隊也。勝保請撥江北步隊一千名駐守天長。已諭知德興阿撥往。至該處馬隊恐難分撥。翁同書所請酌派師船駐泊裕溪口等處。除諭知和春。令吳全美、李德麟分撥布置外。楊載福水師現在圖攻安慶。蹤跡無定。如能攻勦得手。自可通融兼顧。此時尚難抽撥。東壩應防之處。亦諭知何桂清、趙德轍派員嚴密盤查矣。將此由六百里各諭令知之。○又諭。本日據勝保奏請於江北軍營撥兵前赴天長。並據德興阿奏請撥陝甘兵助勦各等語。天長賊匪業經勝保攻勦將縣城克復。惟因懷遠捻匪時圖竄撲。勝保尚須親往督勦。未能久駐。該處已派遊擊保英留兵駐守。但兵力尚單。請飭

德興阿速撥步隊一千名前赴天長。會同防守。另撥馬隊二百名赴勝保軍營等語。德興阿收集馬步各兵為數不少。但恐馬隊無多。著即酌撥步隊一千名派員管帶。即日前往天長。會同勝保所派遊擊保英駐劄天長。以資防勦。至德興阿所請於陝安鎮標內挑撥精兵二三千名赴揚調遣。現在陝甘官兵出征者多。未能再調。况屬緩不濟急。惟有浙江調回之副將朱承先等兵勇一千七百餘名。並陶茂森等兵勇一千一百名。即日可到揚州。此項兵勇准歸德興阿酌留調遣。並速籌克復六合、江浦等處。以贖愆尤。所稱謀報溧水克復。咨商和春撥兵之處。如果溧水已克。江南軍營尚有餘力。

亦自可分兵相助。已諭令和春等量為酌派矣。將此由六百里諭令知之。○又諭本日據翁同書奏。皖賊欲圖下竄。請飭嚴防等語。皖省巢湖水師戰艇。素稱得力。自廬城失陷。此項船隻被燬無存。現在賊踞巢縣廬州。其裕溪口。鍼魚背等處。均係出江要路。該處並無重兵扼剋。著和春即飭總兵吳全美。李德麟。酌派師船駐泊該處。以資扼守。而重江防。至東壩。為下竄要隘。蘇郡係財賦之區。該賊垂涎已久。據稱賊匪於太平府之金柱關。設卡抽釐。直達東壩。深恐東壩委員。但顧抽釐。不知盤詰奸宄。並據勝保奏稱。探知賊匪已在無為州之運漕等處。擄取民船千餘隻。先用千人薙髮。扮作商賈。由

西梁山徑赴太平關。直抵東壩。偷犯蘇州各等語。似此情形。不可不嚴為之備。著何桂清。趙德轍。迅即選派公正道府大員。駐守東壩。認真盤詰。如有商船形跡可疑。暗藏軍器者。立即拏獲訊究。以塞亂源。蘇州府城人煙稠密。恐有奸徒溷跡其中。並著該督撫。派委幹員。於省城及潯墅關等處。認真稽查。毋令賊匪潛蹤。再據德興阿奏。江北須添兵勦辦。已咨和春再撥精兵二三千名。俟周天培一軍到齊。再行撥回等語。現在漂水如已克復。南岸兵力有餘。即可移緩就急。並著和春酌量辦理。將此由六百里各諭令知之。○又諭本日據蔣霽遠奏。鎮遠府城失守。並兵單餉缺情形一摺。貴州鎮遠府

城失事。據稱究由兵丁缺餉潰散。現在賊勢鴟張。韓超一軍進剿。尚形單薄。而各營積欠已久。所到協餉無多。實屬異常緊迫。湖南貴州。唇齒相依。著駱秉章就近添調在防官兵。派員管帶迅速赴黔。協同該省官兵助剿。以壯聲勢。其隨營軍餉及從前奉撥未解各款。並著寬為籌備。一併帶往。以資接濟。將此由六百里諭令知之。○以詹事府詹事殷兆鏞。充日講起居注官。○以克復安徽天長縣。城予副將慶瑞。以總兵官用。賞道員賈臻。三品頂帶。知縣汪景度等。花翎。從九品蘇殿華等。蓋翎。餘升敘有差。○追予江南六合陣亡總兵官羅玉斌。提督銜。道員溫紹原。布政使銜。知縣李守誠。知府銜。並

祭葬世職。建立專祠。○丙午。

上御洞明堂。旬到新疆。貴州。福建。湖南。奉天。情實罪犯。停決貴州斬犯一人。福建斬犯一人。湖南斬犯六人。奉天斬犯二人。餘三十八人予旬。○諭內閣。玉明奏。遵旨修補紅椿。並酌辦章程一摺。

永陵照山周圍紅椿。斲朽既經。該將軍派員敬謹查勘。著即飭令該委員等。先期採辦木植。俟明歲春融。如數栽補。並按月輪派防禦一員。會同該界官常川稽查。如遇有樵採等犯。即行查拏究辦。並飭興京城守尉。通判。按季親往巡視。加結呈報。仍著該將軍隨時派委委員。嚴密查察。如有扶同徇隱情

弊一併從嚴叅辦。其馬爾墩嶺原設紅椿，並著一體補栽，以符舊制。○又諭。玉明奏請添設堆房等語。

昭陵原設堆房四處，閒隔稍遠，稽查恐難周密。著照所請再行添設堆房四處，輪派官兵巡守，以昭慎重。○又諭。玉明奏盜風未靖，請設法嚴緝一摺。盛京地方，每有騎馬持械結夥游行之人，緝捕各員往往因訪查未確，不敢驟行拏獲，以致盜風日熾。著玉明嚴飭各該旗民地方官，隨處躡訪，如遇有騎馬持械三五成羣，形跡可疑者，無論有無搶劫情事，即行盤獲解省究訊。如訊無劫竊確據，即著隨時開釋，俾免拖累。儻查有賊證明確，實係盜賊，即照例送交盛京刑部嚴行懲辦。

以靖地方而安良善。○欽差大臣大學士桂良等奏報上海軍情緊急，夷性難馴，現在商辦情形得旨。該督既可離滬，王有齡何不能離明，係該員事事把持，總恐他人收效。况該督司此次辦理夷務，獨存成見，不准他人入手，殊屬膽大。桂良等甘為其指使，更不可解。况此摺鋪敘粵捻各逆情形，於夷務不過寥寥數語，又未能將節經訓諭之四層逐款籌辦。該督此次任意之所願為一發莫遏，是亦視朕旨若弁髦，罪有浮於耆英者。○以直隸通州協副將湯蘇為宣化鎮總兵官。○旌表守正捐軀山東汶上縣民張汝立妻靳氏。○丁未諭內閣。崇恩奏前任臬司在途患病，懇請回旗等語。丁憂安徽

按察使恩錫。百日孝滿。本係回省辦理糧臺。現仍簡署安徽。按察使。既據崇恩查明該員患病屬實。著准其暫行回京就醫。毋庸開缺。仍著該旗都統等察看。一俟病痊。即行飭令赴任。毋許逗遛。○以阿克蘇辦事大臣海樸。為鑲紅旗蒙古副都統。○實授舒精阿。泰甯鎮總兵官。兼總管內務府大臣。○貴州威甯鎮總兵官懷塔布。因病解任。以江西撫標中軍參將遮克敦布。為貴州威甯鎮總兵官。○以攻克安徽黃池等處出力。署提督周天受。總兵官傅振邦。下部優敘。賞都司田宗興。劉仁福。巴圖魯名號。遊擊陳玉喜。石玉龍。守備周世興。劉仁祿。盛世忠等。花翎。從九品沈琦等。藍翎。餘升擢有差。○

以河南角子山勦匪出力。總兵官邱聯恩。下部優敘。賞守備謝榮升。花翎。把總李象安等。藍翎。餘升擢有差。○以葉爾羌製造礮械出力。予守備田豐等。升敘有差。○以蒙功冒賞。革浙江帶勇都司曾得勝職。並逮問。○予江西玉山等處陣亡知縣劉福林。湯世銓。縣丞諸壽山。參將胡定國。守備龐大文。千總馬潤卿。把總吳正標。周全龍。許廷燦。外委林啟泰。吳大福。祭葬世職。○賞故和闐伯克薩木薩克長子木沙。五品頂帶花翎。世襲罔替。並豁免應交糧賦。○緩徵陝西清澗府谷神木。三縣。被雹被旱村莊舊欠額賦。賑給清澗縣貧民一月口糧。○豁免葉爾羌被擾地方額徵布疋。○戊申。

上詣

安佑宮行禮。○以正黃旗蒙古副都統察杭阿署正白旗滿洲副都統。鑲紅旗滿洲參領博銘署鑲紅旗蒙古副都統。○以鑲紅旗滿洲副都統愛仁暫署管保定等五處官兵事。護軍統領春佑署左翼前鋒統領。○展緩山西洪洞縣被擾地方舊欠額賦。○己酉頒

硃諭。御史孟傳金奏。中式舉人平齡。硃墨不符。物議沸騰。請特行覆試一摺。著派載垣。端華。全慶。陳孚恩。認真查辦。不准稍涉迴護。並將摺內所指各情。可傳集同考官。一併訊辦。○諭內閣。翁同書奏。訪聞徽甯等府愚民。傳習花會。請飭嚴禁一

摺。據稱徽甯等府。近來傳習花會。棚廠林立。刀矛雜陳。局賭輸贏。土豪惡棍。因而漁利。猾吏奸胥。為之隱庇。愚民墮其術中。敗產傾家。甚至釀成命案。大為風俗人心之害。業經該撫嚴飭查拏。出示禁止。惟皖南地方。距省較遠。該撫稽察難周。並恐浙江壤地毗連。不免沾染惡習。著張芾。胡興仁。通飭各府縣。一體嚴禁。實力訪拏。並責令地保舉報。如有劣紳包庇。惡棍把持。及地保等通同容隱。一併從重治罪。該地方官如敢視為具文。別經發覺。即著從嚴叅劾。以挽澆風。○諭軍機大臣等。前因楊能格奏。大營軍潰。德興阿令放全餉。曾諭該大臣等。嗣後仍照舊章覈實開報。茲據楊能格奏。各營清冊。

至今仍未造報等語。軍營領餉必先按實在名冊以杜虛糜。德興阿潰退之後。兵勇傷亡甚多。名數必不足額。何得任意濫支。昨因德興阿奏參楊能格節節退避各款。當諭令邵燦庚長確切查參。如楊能格不勝糧臺之任。著即撤回。另派梁佐中就近暫行辦理糧臺事務。本日覽楊能格奏。因被德興阿參奏。嘵嘵置辯。實屬奸巧。著邵燦等即將楊能格撤回。迅飭梁佐中前往暫辦糧臺事務。一面咨照何桂清。遴員接辦。其德興阿所參楊能格各款。仍著該漕督等查明具奏。至兵勇清冊餉項攸關。德興阿業經獲咎。不得任聽營員仍照從前兵數領餉。致滋弊混。將此由五百里諭知德興阿。邵燦。庚

長。並傳諭署江甯布政使淮海道梁佐中知之。○又諭翁同書奏請派員赴皖。總辦糧臺等語。安徽辦理糧臺之署臬司恩錫。昨據崇恩奏。該員在途患病。懇請回旗。已降旨准其暫行回京就醫。一俟病痊即行赴任。不准逗遛。如該員回京後一時不能就痊。恐耽延時日。此時著翁同書即於皖省道府中遴派一員。暫行辦理糧臺事務。以專責成。至所奏部撥蘇省江海關銀十萬兩。請飭部改撥之處。已交戶部另行籌撥矣。將此由六百里諭令知之。○又諭官文奏遣撤馬隊官兵。請准照數選換。並請派撥西丹赴楚一摺。吉林黑龍江馬隊官兵自調撥楚北以來。屢立戰功。惟經節年傷亡。遣撤存數

無多。現在進勦皖豫各匪。正資得力。所有此次遣撤傷病官
兵一百零六員名。著景瀉、奕山。即照數選換精壯。迅速飭赴
湖北。毋稍遲誤。至請調兩省西丹。並著該將軍等。體察情形。
如尚可調撥。即著各派一二百名。配齊軍裝器械。揀員管帶。
一併前赴湖北。交官文調遣。以資攻勦。將此由五百里各諭
令知之。○以理藩院尚書瑞常。著步軍統領。○以江西新城
縣截擊福建竄匪出力。予道員劉長佑。獎敘。陣亡千總許其
錫。把總王大廷。唐柄興。黃恆山。李才盛。祭葬世職。○庚戌諭
內閣。御史富稼奏。請飭嚴禁錢市。賣空買空一摺。據稱錢市
舊規。各持現銀現錢。互相交易。近日市閒。多有憑空言買賣

之人。並各官號。影射買銀之弊。故銀價日昂。百物因之騰貴。
小民生計愈艱。大為閭閻之害。著順天府五城。迅即出示嚴
禁。如查有空言買賣銀錢者。立即嚴拏。照刑部新定章程懲
辦。失察官員。照例議處。並將代保之經紀。一併嚴懲。以儆奸
商。而平市價。○又諭。德興阿奏。招集諸軍。奮勇進攻。擬嚴定
章程。以示勸懲。一摺。江北一軍。自浦口潰敗。後儀揚相繼失
陷。馬步各軍。節次退縮。深堪痛恨。現在揚州儀徵。先後收復。
天長亦已攻克。而六合尚為賊踞。若不嚴定章程。使各員弁
知所勸懲。愧憤圖功。其何以奮勇勦賊。迅速廓清。各省軍營
出缺。向儘軍營人員拔補。原以殺賊立功。用昭激勸。此次浦

營潰敗。各將弁戰死行間。紛紛出缺。而畏賊全軀之輩。轉得唾手遷官。殊不足以昭公允。除德興阿另請拔補數員外。所出協領以下。至驍騎校。副將以下。至都司。守備各缺。均著咨明直省將軍都統。督撫提鎮。令各歸本營。按班序補。俟續有戰績。再復軍營拔補之例。以昭激勸。至兵勇之奮勉。全恃將領之倡率。若將領見賊先退。各員弁兵勇。必更望風而靡。嗣後旗營自參領協領以下。綠營自副將以下。遇有臨陣退縮者。該統兵大臣。一面奏明。一面即於軍前正法。副都統總兵以上。奏請嚴加治罪。其遇賊逡巡。情節稍輕者。亦著將累次保案。分別奏請撤銷。以肅軍令。至兵丁防勦數年。受傷患病。

難期得力。自應將隨營最久之兵。分別抽撤歸伍。仍由原營換調精壯。補足原額。庶不至以疲之充數。軍營文案委員。暨隨營糧臺委員。履險相隨。准其從優保奏。其後路總辦糧臺委員。止可與團練抽釐諸員。分別請獎。不得過優。以杜僥倖。至所奏隨營出力文員。向來止准免補本班一次。未免阻其上進。應請准予免補兩次之處。著該部議奏。經此次嚴定章程之後。該大臣務當策勵將士。奮勉圖功。以贖前愆。而觀後效。○諭軍機大臣等。前據德興阿奏。江北須添兵勦辦。諭和春等察看。如漂水已克。南岸兵力有餘。酌量移緩就急。本日德興阿奏稱。周天培援軍未到。請旨飭催。並前次張國樑所

留兵二千六百名。懇勿調回江南等語。自為厚集兵力。圖攻六合之計。惟溧水是否克復。尚未據該大臣等奏報。南岸軍情亦關緊要。除張國樑留下之兵。仍著留防江北。毋庸調回外。其德興阿續向和春咨調之兵。著和春等酌量情形辦理。由浙調回之朱承先等所帶兵勇。現聞赴援溧水。俟克復後。即行飭赴江北。將來周天培全軍到齊。亦即統交德興阿調遣。俾得由儀揚前進。會同攻復六合縣城。將此由六百里諭令知之。○以怡親王載垣署正紅旗漢軍都統。理藩院尚書瑞常署正藍旗滿洲都統。都察院左都御史綿森署鑲藍旗漢軍都統。○辛亥諭軍機大臣等。夷務辦法。自桂良等到上

海後。朕於奏報內。業經屢次批示。本已無可再諭。本日據何桂清奏。回抵常州。復將夷務棘手情形。縷晰陳奏。當此時事艱難。該大臣等受朕深恩。諒不敢竟昧天良。希圖遷就了事。但權衡時勢。不但派員駐京。必須極力挽回。即內江通商。及內地游行。賠繳兵費。退還廣東省城各要件。貽害甚大。均不可不設法阻止。桂良等專辦夷務。固屬無可卸責。即何桂清身任地方大吏。受此委任。亦當力圖補救。所有辦法。著仍遵前旨。將此四事。婉為轉圜。與其稱兵於日後。不如消患於目前。現議稅則。該夷必有利益可沾。即可從此措手。不至即行決裂。四事若有轉圜。其餘即照天津及上海現定各款辦理。

該夷若誠心永遠和好。則去此四件。必能長保無事也。至該夷之意。本欲移欵差於上海。如果說定時。四事消弭。桂良等即可允其將欵差移至上海。專辦通商事務。以後各國如有商辦之事。即在上海商辦。廣東仍照舊通商。俟該夷退出省城後。由兩廣總督安定章程。不致民夷爭鬪。儻諸事定議後。夷船再至天津。即為背約。不能如今年相待。但此時大局未定。切不可早為宣露。桂良等當存之於心。屆時再與宣說。如該夷回帆時。不與說明。轉瞬來春。夷船復至天津。惟桂良等是問。至何桂清奏稱。各處游行。雖不能禁止。亦當嚴定章程。以資約束。但恐既許游行。即無從限制。此時朕既肯毋庸拘

泥內定辦法。該大臣等。必當各天忠誠。竭力挽回。為國計民生。豫籌久遠之策。諒桂良等亦必能仰體朕心也。將此由六百里密諭桂良。花沙納。何桂清。並傳諭明善。段承實知之。○又諭。王懿德奏。總兵周天培。在閩攻勦喫緊。不能赴援。江特咨商。曾國藩派兵往援一摺。已於摺內嚴切批示矣。周天培一軍。本係江南派援浙江。由浙赴閩。援勦。雖據奏。該總兵在閩勦匪得力。現於麻溪橋等處扼要設防。正在與賊相持。未便移調他往。惟現在江北情形。較之閩省更為喫重。雖儀徵揚州。業經收復。而六合尚為賊踞。該處並無勁旅。應援。急盼周天培協勦。豈容閩省久留。至曾國藩統領官軍。前據該侍

郎奏報已於九月初九日馳抵建昌。即由杉關入閩等語。計此時已抵閩境。著曾國藩於所部兵勇內酌分一軍馳赴洋口順昌等處。會同閩兵勦匪。周天培即可交替。迅速趕赴揚州德興阿軍營聽候調遣。毋再延誤。將此由六百里各諭令知之。○壬子諭內閣。崇恩奏遵查才能出眾人員。據實保奏一摺。前因王茂蔭奏保山東單縣知縣盧朝安等循聲素著。諭令該撫確查保奏。茲據奏稱現任濟甯直隸州知州盧朝安前在單縣署任。兩次截勦逆匪出力。本年擒匪竄擾山東邊境。該員帶領民團出境迎勦。金鄉魚臺二縣賴以保全。皆由該員平日恩信及民人皆用命。實係才能出眾。堪膺保薦。

盧朝安著先行交軍機處記名。遇有山東知府缺出請旨簡放。仍著送部引見。○諭軍機大臣等。崇恩奏擊退嶧縣竄匪並咨調赴徐兵勇回勦等語。此次逆匪由蕭縣竄犯嶧縣。兵勇失利。至被闖入邊境。經黃良楷帶勇擊勦獲勝。該匪現已漸退。惟現在豐沛尚有賊蹤。與河南會匪勾結。曹單金鄉情形亦屬喫緊。匪蹤飄忽靡常。難保不復來窺伺。山東境內兵力空虛。除曹單練勇素稱得力外。其餘各縣恐未能一律整齊。著崇恩於附近江南河南邊境各州縣。選派公正紳士。會同地方文武實力舉行團練。以助兵力。遇有緊急有備無患。至前由山東調赴清江兵勇一千名。據該撫奏稱現已截回。

兵四百名。自係因防勦本境起見。惟本日據袁甲三奏。臨鳳賊匪復竄。陷五河縣城。該處距浮山盱眙蔣壩甚近。是清淮情形仍未稍鬆。著該撫酌量情形。如東境賊氛稍定。而清淮尚須防勦。即仍將前項截回之兵。飭赴清江。交邵燦。庚長等酌撥布置。以資得力。此次黃良楷接仗獲勝情形。並著查明詳細具奏。將此由五百里諭令知之。○予安徽陣亡參將常瑞。玉祿。營總鄂勒哲依。驍騎校富新。守備李殿元。千總耿超。把總高俊彪。外委張鳳祥等。祭葬世職。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之二百六十六

寶鑑卷三十六

九



